

فن الواو

صاحبي

خُلي اللي يبيعك بيعه
و اللي ينسى الوعود
ليه اللي تقوله تعيده
هو اللي مات بيعود

الخل

هلت الصحبة والقلب مسرور
وأحلى صحاب والخل جات
الجدع مش بحسيرة أو قصور
الأصيل نبيع عليه الخلاجات

الحق

خليك قليل الكلام
وقول الحق في وشه
لا تنشغل بالمالام
ولا تداهن وتغشه

ليه

ليه طبعه هادي وحليم
والحق له عنوان ودليل
طيب وبالأخلاق كريم
قاولوا خايب وعويل

إحساس

حبيبي حافي مشيت له
إحساسه بقلبي وصلّى
يسعدني ورد مشاتله
من بعده يا ما حصلي

السلف

أوعاك تسلف حُمارك
يبقى غيرك عليه رَاكب
تستحي ويزيد حُمارك
فيه ريح تغرق مراكب

عند

يا حبيبي أبعت سلام
وعدى دا باين كَدي
طبعك شديد يا سلام
لكن بالعند مش أدي

عصا

عجوز وماسكة عصاها
ولا حد ب يقول أساعدك
ولد من أولادها عصاها
الأولى بيه كان يساعدك

عتاب

يا جميل ومحنى كعابك
والقلوب عليك بتميل
بسمه منك أدق أعتابك
ومشيك أنا ميت ميل

الزكاة

الرحمة فين يا مؤمنين
الفقير ليه مش لاقى
الزكاة حق بيه مؤمنين
كله ح يزول إلا الباقي

فن

واقف برصيف نمره خمسه
قالوا لي شفت باب الحديد
سرحت في الماضي خمسه
محتاجين فريد شوقي جديد

محال

تعالى ننسي الأحزان
أعيش بحضنك خيال
سأبح وأنا الولـهـان
واعبر حدود المحال

زهرة

ليه ما جاش بـكره
كان نفسي أعيد عليه
أحط في يديه زهرة
غريق بسحر عينيه

قصة

الـبـنـت رسمه القصة
على حاجب سيفه حاد
كياني اتلخبط ببصة
أرحم وقول الميعاد

مهرة

مهرة وبتجر خيطي
وأنا ف العشق موال
المنجة جـوه غيطي
خشي أنا الخـيـال

مداوي

عاشق وعلى الهجر مش ناوي
غزالي قالي بحبك أنا موت
قلت أنا مجروح خليك مداوي
ضمني لحضنك قبل ما أموت

حبوب

أبكي أنا على حالي
لاقي الهرم مقتوب
الواطي بقي عالي
وقالوا عليه حبوب

إنسانية

أفردي علينا الشمسية
وتعالى ع الشط نمشي
صداقه في الإنسانية
أضلل عليك برمشي

أسرار

جتلك أرمي همومي يا بحر
واخبي بين أمواجك أسراري
حافظ عليهم في البرد والحر
و أوعي تبوح له بأخباري

حظ

يا جبل المرمر الأبيض
ارحم حظي الأسود
تعبت وشعري أبيض
قلبك ليـه بقى أسود

بسمـة

طاب الثمر على الشجر
و أنا واقف بعيد مستني
يرمى بسمه لو هواه أمر
عامل فيها مشغول عنى

حرارة

الطبع لو كان جميل
تحس طعم الحرارة
وأدام أبوها أصيل
ما تحس يوم بمرارة

البال

عايب وعمل جريمة
خنقه وبالي طويل
لو روحى زيه غشيمة
أبـح وقول مواويل

العويل

نفسى أتولد أيام الخيمة
اركب ظهر مهر أصيل
أعامل الناس بنية سليمة
تعبت موت من كل عويل

22

مكر النسا قرص عناكب
وقدامك ينوروا الدروب
الحق ماشي، الباطل راكب
العدل ف المحيط مسكوب

23

اللي أتغطى بالنسا عريان
و اللي يسلم يا ضلام ليله
يا ما شبعهم وهو جوعان
لكن تاه في رضاهم دليله

24

سهم الغريب برضانا تاه
سهم القريب أصاب البدن
رشق بمهجة القلب أذاه
عارف خبايانا لبد كالعفن

25

لولا الرسول ما كان النور
ولا عابد صام ولا صلى
اللي اهتدى بهدية مسرور
واللي عصاه بالنار يتقلّى

26

حسرة يا شاهد الزور
يوم القيامة يا حزين
وشك ممنوع م النور
ولا ح ينفعك فدادين

27

ترفع سلاحك يا قاتل
دا أخوك فين الأرحام
يا ما زرع ليك مشاتل
نَغز الشيطان أوهام

28

فين الحبيب اللي حنانه وافي
وأسمه جوا الفؤاد مكتوب
وحضن قلبه الجميل دافي
ونبع مودة والعسل مسكوب

29

لا شطاره ولا بوعيك
كله في الكتاب مكتوب
ولا جري ولا بسعيك
ربك فتحك الدروب

30

يا قلبي تعبت من الدون
جميلك رد عليه بوقاحة
لو عاشرتة تبقى مجنون
لو تعاتبه يرده بأباحة

حرية

باتت تلح بالربيع زهرة
تتفتح في حضن النسيم
تعشقها الحرية وحررة
نالت عشق فرع وسيم

الرحمة

يوم ما تحس أنك مخنوق
وكل طريق تمشييه مسدود
ليه تشكي همك للمخلوق
دا رحمة الرب مالها حدود